



SEKRETARIAT
JAWATANKUASA PENGURUSAN BENCANA NEGERI SARAWAK
(WABAK RABIES)

LAPORAN HARIAN
WABAK RABIES DI NEGERI SARAWAK 2017
18 OGOS 2017

Adalah dimaklumkan pada 19 Ogos 2017 (Sabtu), JPVS akan mengadakan Program Pemvaksinan Anjing di kawasan-kawasan di Bahagian Serian berikut:-

- Kampung Panchor Dayak & Panchor Cina
- Kampung Semada Belatok, Semada Mawang & Semada Tengah
- Kampung Semukoi A & Semukoi Empegang
- Kampung Sg. Apeng, Slabi Entukuh, Sg. Buruh & Singai Turong
- Kampung Stigang Semukoi, Tian Mawang & Tian Sekawan
- Kampung Tapang Maong, Muara Tangga & Beruan

Program Pemvaksinan Anjing ditangguh pada hari ini bagi memberi laluan Program Pemvaksinan Anti-Rabies kepada petugas-petugas wabak Rabies. Secara kumulatif, sebanyak **32,222 ekor** haiwan kesayangan yang terdiri dari **24,580 ekor anjing**, **7,597 ekor kucing** dan **45 haiwan** lain telah divaksin.

JPVS juga meneruskan aktiviti penyiasatan kes-kes yang dilapor berkaitan wabak Rabies. Sebanyak **36,319 surveilan aktif** dan **889 surveilan pasif** untuk mengawal penularan wabak Rabies telah dilakukan oleh JPVS di kawasan Serian, Kuching dan Sri Aman.

Sejumlah **193 sampel** yang terdiri daripada **175 sampel anjing**, **17 sampel kucing** dan **1 sampel kelawar** yang diperolehi dari Bahagian Kuching, Sri Aman, Serian, Samarahan, Betong, Sarikei, Sibu dan Miri telah dihantar ke VRI, Ipoh untuk ujian virus Rabies. Setakat ini, **36 sampel anjing** dan **6 sampel kucing** dari Bahagian Kuching, Serian dan Sri Aman telah disahkan positif daripada **180** keputusan sampel yang diterima.

Operasi bersepadu yang dikendali Kementerian Kerajaan Tempatan bersama JPVS setakat ini telah menangkap **1,085 ekor anjing** terbiar di Bahagian Kuching, Serian, Sri Aman, Sarikei, Samarahan dan Betong sebagai langkah mengawal populasi anjing terbiar bagi mengekang jangkitan wabak penyakit tersebut.

JPVS juga ingin mengingatkan kepada semua pihak untuk mengelak haiwan kesayangan samada yang telah atau belum divaksin dari bercampur dengan haiwan terbiar dan memerhati perubahan sikap dari jinak ke ganas, menggigit sebarang benda yang bergerak, takut air dan cahaya, menyendiri, air liur berlebihan, gelisah dan agresif. Sila hubungi Bilik Operasi Sekretariat Jawatankuasa Pengurusan Bencana Negeri Sarawak di talian 082443991 / 446991 / 447960 untuk sebarang laporan mengenai Wabak Rabies.

Jabatan Kesihatan Negeri Sarawak memaklumkan bahawa sebanyak **84 kes gigitan baru dilaporkan pada hari ini**; iaitu **17 kes daripada Bahagian Serian**, **3 kes daripada Bahagian Sri Aman**, **56 kes daripada Bahagian Kuching** dan **8 kes daripada Bahagian Samarahan**. Daripada jumlah tersebut, 72 kes melibatkan haiwan peliharaan iaitu anjing 49 kes dan kucing 23 kes. Manakala, 12 kes pula melibatkan haiwan liar atau tidak bertuan, iaitu, anjing 9 kes, kucing 2 kes, dan monyet satu kes. Ini menjadikan bilangan kes kumulatif gigitan haiwan yang berlaku mulai 01 April 2017 hingga ke hari ini, adalah berjumlah 2,670 kes. Secara kumulatif juga, seramai 985 orang telah menerima suntikan vaksin anti-Rabies. Untuk makluman, bukan semua kes gigitan yang memerlukan suntikan vaksin anti-Rabies. Setiap kes gigitan akan dinilai secara klinikal oleh pakar perubatan sebelum ditentukan samada vaksin diperlukan atau sebaliknya..

Jabatan Kesihatan Negeri Sarawak memohon orang ramai yang mempunyai sejarah gigitan anjing dalam tempoh 01 April 2017 hingga kini, untuk segera membuat pemeriksaan di mana-mana fasiliti kesihatan yang terdekat. Dalam masa yang sama, orang ramai turut diingatkan untuk sentiasa menghindari diri dari gigitan haiwan terutamanya anjing, dan sekiranya digigit, perlulah mengambil langkah pencegahan segera dengan mencuci luka bahagian terkena gigitan menggunakan sabun dan air bersih yang mengalir selama 15 minit dan segera mendapatkan rawatan lanjut di klinik atau hospital berdekatan.

Disediakan oleh:

Angkatan Pertahanan Awam (APM) Negeri Sarawak

Sekretariat Jawatankuasa Pengurusan Bencana Negeri Sarawak

18 Ogos 2017